

مرند اۆيكو

Mərənd öykü



ياريش

يازار: نريمان ناظيم

Web address:[www.marand-oyku.arzublog.com](http://www.marand-oyku.arzublog.com)

Facebook:[www.facebook.com/marandoyku](http://www.facebook.com/marandoyku)

Email:[rezaaydin491@yahoo.com](mailto:rezaaydin491@yahoo.com)

## ياريش نریمان ناظیم

دایاناجاقلاردا بیر نچه دقیقه دایانیردی. بیر تعداد ائیب، بیر تعدادایسه مینیردی. یئنی دن یولا دوشوردو. بورولا- بورولا داغلار کناری دره لرین قیراغی لا اوزونه یول آجیب، گئیدیردی. سورعتله کۆریولری اؤتوب، تونل لری کئچیردی.

قاتاردان دیشاری هر نه واریديسا، سانکی لحظه لر قوناغی ایدی. بیرجه آن گۆز اؤنونده دوغولور، هله سئچیلیب سئچیلمه میش، گئجه ده آخان اولدوز تک، آخیب یوخا چیخیردی.

کوپه لرین بیرینده گئدن قیزغین مباحثه قیش گنجه سی نین کورسوسو کیمی کوپه ده کی لرین باشین بیر یئره بیغمیشدی. بیر گنج اوغلان حرارتله دانیشیردی. اونون خطابی یاشلی بیر کیشی یه اولورسادا، باشقالاری نین ماراغینی داها آرتیق قازانمیشدی. اونلار تام دقتله اوغلانی دینله ییردی لر. بونولا بئله او سؤزون سونا چاتدیرا بیلمه دی. چونکی یاشلی کیشی اعتراض بارماغین قالدیریب، اوغلانین سؤزون یاریدا کسدی:

-یوخ، اولمادی. دایان! دایان بیر گۆروم سنین هامیسی نچه یاشین وار؟ بیرمی... بیرمی ایکی. لاپ توتاق بیرمی دؤرد. هله سن نه یاتیسان، نه یوخو گۆره سن؟ آما من گۆرموشم. گۆرموشم و گۆره- گۆره ده گلیمشم. بیر دانا آخیرا چیخانی اولماییب. گۆر بیر دوز باش گؤرا آپارا بیلیب؟ یوخ، آپارماییب. فرقه لیکده ... لاپ ائله بیل دون ایدی. ایکجه گونون ایچینده بیرین قویمادیلار قالا. اؤز گۆزومون قاباغیندا اوچ- دؤردون بازار آغزیندا گبرتدی لر. اللرینه دوشه نی قانادیلار. اؤلن اؤلدو، قاچان قاچدی. دئییردی لر بس گۆره سن حالوا پایلابیرلار. گلن گئتدی فدایی یازیلدی. آما من؛ یوزو گلدی قاپیا کی گل یازیل، یازیلما دیم. او قدهر بوگون- صباح ائله دیم آخیر کی فرقه داغیلدی؛ ... گلدی چیخدی مصدق لیگه. گینه ده مرده باد، زنده باد باشلاندى. دای آدم قالما دی قوشولمویا. گئنه ده من قوشولما دیم. آما بیر ایش گۆرموشدوم کی هم شاهچی لار منی ایسته بیردی، هم ده مصدقچی لر. سؤز اوزانماسین اونودا تختدن سالدیلار. توتولان کیم، آسیلان کیم؛ آما منیم گۆزوموده پیله یین اولمادی... حزب رستاخیز کی قویولدو، گۆردوم یوخ، بونون آلتیندان قاچماق اولمویاجاق. دولت نوکری اولاسان بویون قاچیراسان؟! اولان ایش دئییل. گئتدیم آنجاق یازیلدیم. اما ائله یازیلدیم دا. جلسه- جلسه کی اصلا توتوق وئرمزدیم. فقط بیر قورو آد؛ والسلام. آما نه ایشین وار، گل گۆر نه قدهر قارین آغریسین چکدیم اونون. مخصوصا انقلابدان سونرا. ائله قارینیمی اوووشدوردم کی آلاسه گۆره سن نه تههر اولاجاق بو؟ آما گئنه هر نه ایدی آلاسه اوزومه باخدی، منی دیندیرن اولمادی. ویردی بو انقلاب باشلادی. تبریز قاریشدی؛ دالینجا تهران،

اصفهان، هارا ، هارا. دئدیم محال مومکوندو هئش زاد ائلییه بیلمز لر. هله بازنشسته اولمامیشام؛ اؤزوده هاردایام، بوستان آوادا؛ رئیس اداره یم. بوگون- صاباح، بوگون- صاباح، آنجاق گون او گون اولدو کی دئدیلر صاباح بوردادا راهپیمایی دی. اوندایدی کی دئدیم یوخ، دوستوم بو یول دئییه سن انقلاب دوغرودان انقلاب دی. فورا اؤزومو یئتیردیم بانگا. حسابیمی تامام- کامال بوشالتدیم. کئچدیم بازارا. بو نه دی یاغ، دویو، لپه، مرجمک، نه، نه، هره سینن بیر تای، ایکی تای، اوج تای آلدیم، گتیردیم بیغدیم زئرمییه. سورا ایکی دست اعلا واراغ، لاپ درجه یک تبر؛ بیر جوتده حسابی داش آلیب گئتدیم ائوه. دئدیم آرواد آل بونلاری قوی محکم بیر یئره کی بیر گون کاریمیزا گله جک. دئدیم بئله کی باخیرام مومکوندو لازیم اول؛ ایکی آیانان، اوج آیانان ائودن ائشیگه چیخمالی اولمو یاخ. بعلی، بونلارین هامیسی تجروبه دی. ایشیم اوندا یوخ کی آلاه طرفی ایش او قده رده اوزانمادی. آما گئنه احتیاط شرطدی. همن آلدیغیم یاغ، دویونو بیز جنگ ایللرینده هنوزدا یئیردیک. عرضیمه التفات بویورورسان؟ ...”

بورا یئتیشنده کیشی نین گؤزلری کوپه ده کی لری بیر- بیر دولانیب، گلیب دایاندی گنج اوغلانین اوزونده.

”خوب، نئجه دی اوغول دوستو؟ ایندی سن بویور گؤره ک اصل سیاستمدار منم، یوخسا او یوموروغون دویونلویوب کؤتک یئین لر؟”

اوغلان بیر سؤز دئمه دی. اونون دوداقلارین معنالی بیر گولوش مۆهورلمیشدی. باخیشی داها مرکب معنا داشییردی. کیشی فقط بیر نئچه لحظه اونون باخیشینا قاتلاشا بیلدی. سونرا وئردیگی سووالین جاوابیندان واز کئچن کیمی، هؤولجک دؤنوب پنجره دن ائشیگه باخدی. کوپه ده کی لر فیکره دالدیلار. اونلارین هره سی جاوانین سوکوتونو و اونون باخیشیندا کی معنای بیر جور دوشونوردولر. قاتار ایسه اؤز یولون گئدیردی تام سورعتله؛ سانکی زامانلا یاریشیردی.